

# INUIT ATAQATIGIIT

## INATSISARTUNI



26. oktober 2011  
Juliane Henningsen

Inatsisartut Suleriaasianni § 37 naapertorlugu Naalakkersuisunut apeqquq imaattoq matumuuna saqqummiuppara:

Politikkut piviusunngortinniarlugu sulissutigingaatsiareerlugu, nunatsinni isiginnaartitsisarneq pillugu inatsit 1.1.2011-miit atuutilersinneqarpoq.

Inuiaqatigiit akornanni isiginnaartitsisarnerup aqqissuussamik piviusunngortinneqarnissaa assut isumalluarfigineqarpoq. Taamaattumik Inatsisartuni ilaasortatut apererusuppunga, Nunatta Isiginnaartitsisarfissaa aammalu isiginnaartitsisartunik ilinniartitsisalernissaq sumi inissisimanersut.

Isiginnaartitsisarneq pillugu Inatsisartut inatsisaata qulakkeerpaa, nunatsinni sumiluunniit inuussutissarsiutigalugu isiginnaartitsisarnerup taamatullu saniatigooralugu isiginnaartitsisarnerup ingerlanneqarnissaasa sinaakkuserneqarnissaat.

Nunatsinni isiginnaartitsisarfiup pisussaaffigivaa ilinniartitaanikkut aqqissussaassimasup iluani isiginnaartitsisartussanik ilinniartitsisarnissaq.

Inatsisartut 2010-mi inatsit akuersissutigigamikku, aamma ilanngullugu akuersissutigivaat isiginnaartitsisartunik ilinniartitsialernissap aallartinneqarnissaa, takuuk § 11, tamannalu 1. August 2011-mi aallartinneqassasoq.

1. Pilersitsiniarnermut inissisimaffik sumut killippa?
2. Inatsit tunngavigalugu atorfiit qassit inuttalerneqareersimalerpat, tamatumani Nunatsinni Isiginnaartitsisarfik aammalu isiginnaartitsisartussanik ilinniartaaneq eqqarsaatigalugu?
3. Qaagumut naatsorsuutigisinnaavarput, nunatsinni isiginnaartitsisartunngorniarlutik ilinniartitaalersussat aallartissinnaanissaat?
4. Naalakkersuisut isiginnaartitsisartussanik ilinniartitaanissamut pitsaasusissaanut qulakkeerinnittussanik Ilinniartitaanermut Siunnersuisoqatigiinnik pilersitsippat?
5. Inatsit pineqartoq tunngavigalugu Nunatsinni Isiginnaartitsisarfiup aamma ilanngullugit siunnersuiffigisassavai sunngiffimmini isiginnaartitsisartut

aammalu piffinni assigiinngitsuni isiginnaartitsisartut ingerlatsineranni isiginnaagassianillu suliarinninneranni siunnersortassallugit. Aamma Nunatsinni Isiginnaartitsisarfiup qinnuigineqarnini naapertorlugu atuarfinnut ilinniarfinnullu isiginnaartitsisarneq pillugu siunnersuisartussaapput. Nunatsinni isiginnaartitsisarfiup tamanna siunertaralugu sinerissami siunnersuisarnissaminnik pilersaarusiorsimappat?

6. Naalakkersuisut inatsisip atuutilersinniarnernanut tunngatillugu allatigut saqqummiussassaqarpat?